
Ang ika-anim na utos, "Huwag kayong papatay," marahil ang kaisa-isang utos na maaaring makita ng marami na s'yang may pinakamaliit na kaugnayan sa kanilang buhay. Subalit ang utos na ito ay may itinuturo sa ating buhay at sa kalagayan ng ating mga puso. Sa araling ito, ating titignan ang tatlong katotohanan na maaari nating matutunan sa utos na ito.

1 Ang tao ay ginawa ng Diyos na kawangis Niya.

"Ang sinumang pumatay sa kanyang kapwa ay dapat patayin din ng kanyang kapwa. Sapagkat ang tao ay ginawa ng Diyos na kawangis niya."

GENESIS 9:6

Ginawa ng Diyos ang tao na kawangis Niya (Genesis 1:26). Ang Diyos ang may-akda ng buhay at ang ating pamumuhay ay may kaugnayan sa Kanya. Ang tao ay naiiba sa lahat ng nilikha ng Diyos dahil tayo ay kawangis Niya. Ito ang dahilan kung bakit pinahalagahan ng Diyos ang buhay, at ang sinumang nagdadala ng kanilang buhay sa kapahamakan ay mananagot sa Diyos. Ano ang sinasabi ng Bibliya tungkol sa tao? (Mga Salmo 8:4,5)

2 Ang buhay ay bigay ng Diyos sa tao.

. . . Nilikha ng Panginoong Diyos ang tao mula sa lupa. Hiningahan niya sa ilong ang tao ng hiningang nagbibigay-buhay. Kaya ang tao ay naging buhay na nilalang. **GENESIS 2:7**

Ang paggalang sa buhay ay nagmumula sa pagkilala na ang buhay ay kaloob ng Diyos sa atin. Bagama't ang ibang nilalang na ginawa ng Diyos ay binigyan din Niya ng buhay, tanging ang tao lamang ang Kanyang hiningahan na nagbibigay-buhay. Mahalaga ang buhay, at dapat natin itong pahalagahan. Ang paggalang natin sa buhay ng tao ay nakikita sa ating paraan ng pakikitungo sa ibang tao, at paraan ng pagtugon sa lahat ng nakikisalamuha sa atin. Ayon kay Pablo, paano natin dapat pahalagahan ang ibang tao? (Mga Taga-Filipos 2:3)

3 Ang pagpatay ay nagsisimula sa puso.

⁶Kaya tinanong siya ng Panginoon, "Ano ba ang ikinagagalit mo? Bakit ka nakasimangot?" ⁷Kung mabuti lang ang ginagawa mo, maligaya ka sana. Pero mag-ingat ka! Dahil kung hindi mabuti ang ginagawa mo, ang kasalanan ay maghahari sa iyo. Sapagkat ang kasalanan ay katulad ng mabagsik na hayop na nagbabantay sa iyo para tuklawin ka. Kaya kailangang talunin mo ito." **GENESIS 4:6,7**

Si Cain ay nagselos kay Abel dahil sa kabutihang-loob ng Diyos sa kanya. Ngunit paano nauwi sa pagpatay ang pagkakaroon ng inggit at sama ng loob? Ang lahat ng ito ay nagsimula sa puso ni Cain. Ito ang dahilan kung bakit sinabi ng Panginoon kay Cain, ". . . ang kasalanan ay nagbabantay sa iyong pinto . . . subalit dapat mo itong talunin." Ang salitang "pagyukyok" o pagbantay ay gaya ng paggalaw ng isang hayop na naghihintay upang makatuklaw o makahuli ng iba pang hayop. Kung pahihintulutan nating mamahay sa ating mga puso ang hapdi at inggit na ating nararamdaman, maaari tayong mabitag gaya ng patibong na kinahulugan ni Cain. Paano natin dapat harapin ang galit, ayon sa Mga Taga-Efeso 4:26,27? Ayon sa 1 Juan 3:15, ano ang tawag sa atin kung kinamumuhian natin ang ating mga kapatid?

APPLICATION

- Ngayong alam mong ang buhay ay mahalaga at isang biyaya mula sa Diyos, ano ang isang bagay na babaguhin mo tungkol sa paraan ng pakiki-tungo mo sa ibang tao simula ngayon?
- Mayroon ka bang kailangang patawarin? Ano ang gagawin mo tungkol dito simula ngayong linggo?
- Paano mo mababantayan ang iyong puso laban sa inggit at sama ng loob? Mayroon bang taong tumutulong sa 'yo upang mamuhay ka nang may pananagutan? Paano mo pa mapalalalim ang iyong pagkaka-unawa sa Salita ng Diyos?

PRAYER

- Pasalamatang ang Diyos sa handog Niyang buhay at sa buhay na walang hanggan na mayroon tayo kay Cristo.
- Hingin sa Diyos ang kakayahan na mapagtagumpayan ang mga pagsubok na maaari mong kaharapin sa iyong mga relasyon.
- Ipanalangin na ikaw ay maging tagapagdala ng pag-ibig at kabutihan ng Diyos sa lahat ng bahagi ng iyong buhay, at na makita ng ibang tao ang iyong halimbawa.



VICTORY

© 2016 by VICTORY®
Reserbado ang lahat ng karapatang pag-aari.

Lahat ng sipi ay mula sa ANG SALITA NG DIOS®
Karapatang Pag-aari © 2010 ng Biblica® Ginamit na may pahintulot
mula sa Biblica Publishing & Distribution Foundation, Inc.® Reserbado ang lahat ng pag-aari.
victory.org.ph